

2 SAN JUAN

Yi Mimetzpì Necy Huidibì San Juan Yajnigüejsx Tüg Mibijcpi Töxyjäybi

¹Hich Juan huidibì nigohuajc'ajt Dios yjäy. Nyajnigüejspxìch miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajnigüejspxìch jada necy tüg'óciy miich m'ung m'anäc ajcxy. Ooy ndzocy njihuüyich miich ajcxy. Ca' nmīnaanīm iich naydügpajc ndzojcyp njihuüybich miich ajcxy, nañ jadu'n tüg'óciy jäy ajcxy, huidibì huinjihuüygixp Dios ytiy'ajt, xychojccixp xyjihuüygixp ajcxy.

²Hich miich ajcxy ndzojccixp njihuüygixp com Dios ytiy'ajt yajpatp ma iich ajt njot nhuinma'n, etz yi' ijtp huinixi ma iich ajt.

³Huen Dios Teedy etz iich ajt nHuindzin Jesucristo, yi Dios y'ung oy'ajt may'ajt tuñ miid miich ajcxy, huen xypa'ayoogixy huen xyajjotcugiigixy miid co mguydungixy yi' ytiy'ajt etz mnaychójcigixy mnayjihuüygixy miñ xyipy.

⁴Ti nmīnaybadyijich nijējity miich m'ung m'anäc, e ooy njotcugiigixy miid co tiydudägy ajcxy payöyì Dios ytiy'ajt, jadu'n nej

Dios Teedy ajt ti xyñajtz'ane'miüyim.

⁵Cham njacnīmāyich miich ajcxy co jēbi ajcxy mnaychójcigixy mnayjihuüygixy miñ xyipy. Ca' nmīnaanīm huinjemy jada tiy'ajt huidibì cham nyajnijayiygixipy. Je' jada je ayuc huidibì oga'n'aty ti nbaatim co ti nmibijcim Jesucristo. ⁶Co ndzojcim njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'miüyim. Jada huidibì Dios ti xyajnajtz'ane'miüyim huidibì miich ajcxy ti mbaatcixy, co oga'n ti mmibijccixy Jesucristo, copicy co ajcxy mnaychójcigixipy mnayjihuüygixipy.

Yi jäy ajcxy huidibì aniidaaccixp

⁷Com ji mayjäy ya naaxhuiñ huidibì huin'iimb yi jäy ajcxy. Yi' ajcxy ti puhuäctüdy mibijcpidijc, yaj'ixpijcp ajcxy co Jesucristo ca' ñayguëxici ya naaxhuiñ miid ñinīcx. Jadayaabi jäy ajcxy yhuin'iimyb yhueñypinīty etz Jesucristo ymidzip'ajtyp ajcxy.

⁸Naygüendi'ájtigix cī'm. Ix mgamijpidaaccixy yi' ajcxy y'ayuc.

Co ajcxy myajhuin'íngixipy, huin'it
 anajty myajtigooygixy je oy'ajt
 huidibi mbadaangixyp ma Cristo.
 Co mguydúngxixipy Jesucristo
 ytiy'ajt, huin'it mbáatcixipy tüg
 oy'ajt ca'pxypi jii by tzajpjoty.

⁹Tüg'óciy jáy huidibi ca'
 cuydungixy je Jesucristo y'ayuc
 ytiy'ajt, ca' ajcxy miidity Dios
 ytiy'ajt ma ajcxy yjot yhuinma'ñ.
 Je jáy ajcxy huidibi cuydundiib
 je Cristo y'ayuc ytiy'ajt, ymiid
 ajcxy Dios Teedy etz je y'ung
 ytiy'ajt ma ajcxy yjot yhuinma'ñ.

¹⁰Peni ji pinjaty ñicxy ma
 miich ajcxy huidibi yaj'ixpijcp
 huidibi ca ytiy'ajtiny, ca' ajcxy
 mgöbiguipy ma mdiñcin, e ni ca'
 ajcxy mjijp'ixihuipy. ¹¹Com Dios
 yjáy pinjaty anajty jijp'ixiib je

jáy ajcxy huidibi yaj'ixpijc huidibi
 ca' ytiy'ajtiny, hue' je' tundigooyb
 ma Dios ytiy'ajt. Hue' je' anajty
 paady jadu'n nej jihuiy ti jijptigiinyñi
 ajcxy je huingbi xpijcin huidibi ca'
 ytiy'ajtiny.

Capxycíjxin

¹²Oy iich ooy mij may miich
 ajcxy njamiidmiydägaangixy per ca'
 miich ajcxy jadu'n nijayihuaangixy
 necy'am. Hue' janchtiy njijp'ixiyich
 co ci'm nninixaaangixy jim, e nmiid
 miydägaangixy au'am jigix ajcxy
 ooy jotcuje mnayjihuiyigixipy.

¹³Je mdzi' y'ung ajcxy huidibi
 ya yajpatcixp xyajniguejxp
 ycapxpocxin, je huiidi ajcxy Dios
 nañ jadu'n ti yhuin'íjxigixy. Jadu'n
 ngapxycíxyich miid miich. Amén.